

Segunda Carta a Timoteo Apostol Pablo Timoteoman Ishcaycag Carta Apatsingan

Apostol Pablo Roma carcelchö caycar wañucunapagna caycarmi, Dios Yayata alläpa agradëcicurnin Timoteo rasumpa firmi criyicug captin cay cartata apatsirgan. Tsaymi Timoteota pliturnin consejargan, tculäya amatsacuy sufrimientu pruebacunata päsarpis, criyicuñinchö alli firmi tsaracur, “Señor Jesucristopa alli soldädun” cananpag (1:1-2:13). Tsaynöllam consejarnin yarpätsirgan quiquinpa cawayninchö llutan mana väleg cuentucunatawan quiquincura puralla piñanacatsicug mana alli parlaycunatapis ni imay mana chasquinanpag.

Tsaynöpam Pabloga cartacun mana píninnag prësu gaycuraycangantawan llapan yanapagnincunapis jancat dëjashga cayanganta y Lucasllana paywan pagta caycanganta. Tsaynöpam manarag wañucuptin sasllana Timoteo ricagnin shamunanta munargan. Tsaynö tucuyläya sufrimientucunachö caycaptinpis Señor Jesucristo imaycawan yanaparnin ni imay mana dëjangantam alläpa agradëcicur cartacurgan (4:6-22). Tsaymi Pablo Timoteota rugargan, quiquin cawacungannölla mana jutsannag, alli yachayyog cumplidu cayninwan imaycachöpis pacienciacurnin firmi criyicur, gaticachäyaptinpis alli firmi tsaracur cawacunapag.

Pablota autoridäcuna manarag wañutsiyaptinmi, Timoteoman imaypis Dios Yaya munangannö shumag cawanapag alli plëturnin consejar cartacurgan.

Apostol Pablopá saludacuynin

¹ Noga Pablotam Señor Jesucristo apostolnin canäpag acramar churamashga, Dios Yaya munangannö Señor Jesucristowan mana ni imay ushacag caway änicunganta willacunäpag.

² Tsaynöpam quiquiipa wamränö captiqui cuyay Timoteo, cay cartata gamman gellgamü. Tsaymi Dios Yayapawan Señor Jesucristopa cuyacuy yanapacuyninwan llaquipäcuynin y alli päsacuynin gamwan caycullätsun.

Apostol Pablo Señor Jesucristoman firmi criyicur cumplidu cayänanpag plëtucungan

³ Pagasta junagta mañacurnin gampag yarparangätam Dios Yayata agradëcicü. Payta limpiu shongöwan unay ayllúcuna serviyangannö servingäta. ⁴ Tsaynöllam despedinacungantsic öra wagangayquita imaypis yarparaycä. Tsaynö wagangayquita yarparmi gamwan yapay tincusquir cushishga cayta alläpa munä. ⁵ Yarparaycämi rasumpa firmi criyicug cangayquita. Gam criyicungayquinöllam awilayqui Loidawan mamayqui Eunicepis Dios Yayaman criyicuyargan. Tsaymi gamtapis alläpa confiacug paycunanölla rasumpa alli firmi criyicug cangayquita. ⁶ Tsaymi yarpätsig gampa janayquiman maquïta churamunga öra, Dios Yayapa Espíritu Santonpita allish

yachayniqui chasquingayqui, imaypis gamchö mana ushacänanpag. ⁷ Dios Yayaga manam mantsacuy espirítutatsu garamashcantsic, sinöga poderoso cuyacug alli juiciuyog canapagmi Espíritu Santonta nogantsicman cachamushga.

⁸ Tsaymi gamga ama pengacur mantsacuytsu Dios Yayapag willacuya ni noga píraycu prësu cangätapis. Mas bien alli valoracurnin Señor Jesucristopa Alli Willacuyninta shumag willacunqui, imayca sufrimientucunata pásarpis, quiquin Dios Yayam poderniwan nogatanö yanapashunqui. ⁹ Dios Yayaga salvamarnintsic mana jutsannag cawaymanga gayamashcantsic, manam quiquintsicpa ruraynintsicllapitatsu, sinöga quiquinpa munayninwan alläpa cuyacug car, llapan bendiciun yanapacuyninwanmi. Dios Yayaga cay patsata manarag camarmi änimargantsic, Señor Jesucristoraycu salvamänapag canganta. ¹⁰ Tsaynöpam cananga Señor Jesucristo cay patsaman Salvamagnintsic shamur, alläpa cuyacug cayninta revelar musyatsimashcantsic. Paymi wañuyta vencernin alli cawayta imayca actsimannö imayyagpis mana ushacag cawayta jipimushga, Quiquinpa Alli Willacuyninwan musyatsimarnintsic. ¹¹ Tsay Alli Willacuyninta willacünäpagmi quiquin acramashga, apostolníin cayniwan maytsaypa aywarpis yachatsicunäpag. ¹² Tsaynö yachatsicungäraycum cay llapan imayca sufrimientucunatapis sufriycä. Pero manam ni imapita pengacur mantsacütsu, rasumpa piman criyicungäta musyarnin. Paymi poderninwan imaycapitapis tsapämanga. Tsaymi Dios Yayata llapan cawaynita entregashcä asta

Señor Jesucristo cay patsaman cutimunganyag.

¹³ Tsaynölla gampis Señor Jesucristoman rasumpa firmi criyicuyniquian cuyacurnin, nogapita alli ejemplu yachatsicuycuna yachacungayquita mana dëjaypa sïginqui. ¹⁴ Nogantsicchö caycag Espíritu Santopa poderninwan alläpa chaniyog Alli Willacuyninta cuiday, quiquin Dios Yaya confiacushungayquinö.

¹⁵ Gamga musyanquinam Asia provinciachö caycapti llapan runacunawan Figelo y Hermogenes dejascayämanganta. ¹⁶ Pero Dios Yaya llaquipaycutsun Onesiforopa wajinchö aylluncunatapis. Payllam atsca cuti imayca callpata garamagnö animatsimashga. Tsaynöllam mana ni imapita pengacur ni pengacur Romachö prësu caycaptipis watucamagni shamushga. ¹⁷ Tsaypa rantinmi mana ni imapita mantsacur Roma marcaman chaycamurpis, mana ajayaypa asta tarimanganyag ashimargan. ¹⁸ Paytaga Dios Yaya llaquipaycullätsun Señor Jesucristo cutimungan junagchöpis. Gampis musyanquim Efeso marcachö llapan imaycachö yanapamangantsicta.

2

Señor Jesucristopa soldädu

¹ Tsaymi cuyay wamränö Timoteo, firmi criyicur alli tsaracuy Señor Jesucristo alläpa cuyacuyninwan yanapashuptiqui. ² Atscag runacunapa puntanchö wiymangayquita, criyicug runacunata yachatsirnin encargay. Tsay criyicug runacunaga rasumpa confiacuypag cumplidu allish yachatsicug cayätsun. ³ Señor

Jesucristopa alli soldädunnö, llapan sufrimientücumata nogacunanö päsarpis awantanqui.

⁴ Manam ni maygan soldädupis serviciuchö caycarga, cay munduchö munaynincunataga ni imaypis ruranmantsu, sinöga mandagnin mandanganllatam cumplirnin ruranman.

⁵ Tsaynöllam premiuta gänananpag pucllag runapis, pucllanganchö llapan mandayanganta mana cumplirga coröna premiutapis chasquintsu.

⁶ Juc chacrachö murucug runapis alli trabajanganpitam, puntacag cosechata gorinanpag merëcin. ⁷ Cay ningacunata shumag yarparar tantiyanqui, quiquin Señor Jesucristom llapan imaycatapis shumag entenditsishunqui.

⁸ Ama gonganquitsu Davidpa ayllun Señor Jesucristo llapan wañushgacunapita cawamunganta. Cay japallan Alli Willacuymi, noga willacungäga. ⁹ Tsaynö willacungäpitam tucuyläya sufrimientucunatapis päsaycä, imayca wañutsicushganö atsca cadenawan cadenashga. Pero Diospa Palabrange manam cadenawan cadenashgatsu caycan. ¹⁰ Tsaymi imaycatapis sufriycä Dios Yaya acrangan runacunapag, paycunapis Señor Jesucristopa glorianchö mana ushacag caway salvaciunta tariyananpag.

¹¹ Cay Alli Willacuya rasumpacagmi:
Si Paywan rasumpa wañurga,
Paywanmi wañungantsicpitapis cawamushun.

¹² Si Paywan imaycachöpis sufrirnin rasumpa awantarga,
Paywan pagtam Mandacuy Reynonchö mandacur jamaycätsun.
Si nogantsic Payta négashgaga,

Paypis nogantsicta négamäshunmi.

¹³ Si nogantsic imaypis voluntäninta mana cäsurnin cumpliyashgapis,

Payga cumplidu cayninwanmi ni imaypis déjamäshuntsu.

Payga manam quiquinpataga négacuyta puedinmantsu.

Dios Yaya chasquingan alli arupucugnин

¹⁴ Caycuna yarpätsiytaga ama ni imaypis gonganquitsu. Tsaychö caycag criyicugcunata Dios Yayapa puntanchö alvertinqui ni imapag väleg büllata rurarnin piñanacur discutinacuynapita witicuyänanpag. Tsaynö büllata rurar piñanacur discutinacuya manam ni imapagpis välentsu. Tsayga mas bien tsaychö llapan wiyagnincag runacunatapis mana allimanmi tictratsinga. ¹⁵ Imaycanöpis Dios Yayapa pantanman chayta tīray, imayca juc alli arupucug runa ni imapita mana pengacurnin, Diospa Palabran rasumpa canganta mana juc pantar llapanta shumag yachatsicurnin. ¹⁶ Tucuyläya mana alli ruraycunapag parlaycunapita witicunqui. Tsaynö llutan mana allicunata parlarnin discutinacugcunaga, manana llaquipäcurmi mas jutsasapa cayman tictrayan. ¹⁷ Tsayrunacunapaga yachatsicuynincunapis imayca cancer geshyay llapan entëru cuerpu miragnömi maytsayman miraycan. Tsaynöllam Himeneopawan Filetopa yachatsicuynincunaga, ¹⁸ rasumpacag Alli Willacuypita jancat raquicashga caycäyan. Paycunaga yachatsicurnin purirmi niyan:

“Wañushgacunaga cawayämushganam” nir. Tsay yachatsicuynincunawanmi waquincagpa criyicuynincunatapis pantatsirnin jancat ushacätsiyashga. ¹⁹ Tsaynö caycaptinpis Diospa Palabrange mana cuyug cimientunömi alli firmi tsaracun. Tsaypagmi imayca sëllagnö señalashga Palabran nirgan: “Señor Jesucristom paypacagcunata regen.” Tsaynöllam caycagpis nirgan: “Tucuyläya llapan imayca mana allicunapitapis witicuyätsun, Señor Jesucristopa shutinchö Dios Yayaman imatapis mañacugcunaga” nir.[◊]

²⁰ Juc jatun wajichö väsucunaga manam gorillapitastu ni gellayllapitatsu, sinöga gerupitawan mitupitapis canmi. Tsaymi waquincagga imapis mas allicagcunallachö üsayänanpag y waquincagnam lluta imaycachöpis segidü üsayänanpag. ²¹ Tsaynömi si pipis llapan mana alli ruraynincunata déjasquir allillatana rurar cawaptinga, tsay runataga Dios Yaya jutsannagta tictratsir imapis llapan allicag ruraycunaman churarnin üsanga.

²² Jövencunapa llutan mana alli munaynincunapita witicur geshpicunqui. Tsaycunapa rantinga firmi criyicurnin, runamajiquicunawan cuyanacur cushishga alli cawacunqui. Tsaynölla umilde limpiu shongoncunawan Señor Jesucristopa shutinchö mañacug runacunawanpis alli päsacunqui. ²³ Ama cäsuytsu upanö mana imapagpis servig discutinacur bülla ruragcunata. Gamga musyanquim tsay discutinacuywanga

[◊] **2:19** Nm 16:5.

imaypis piñanacuylaman chäyanganta. ²⁴ Dios Yayapa servignin runaga manam piñanacurnin purinmantsu. Mas bienmi llaquipäcug alli rurag runa canman llapan runamajincunawanpis. Tsay runaga mana piñaycacharmi shumag paciencianwan imaycachöpis yachatsicunanpag listo caycanman. ²⁵ Tsaynö alli rurag cayninwan mana cäsucug runacunatapis arepentcatsirnin yachatsinman, Diospa Palabranta entenditsiptin jutsancunata dëjasquir payman cutir alli rurag cayänanpag. Tsaynöpam tsay runacunataga quiquin Dios Yaya rasumpacagcunallata entenditsir musyatsinga. ²⁶ Tsaynö entendirmi, imayca ricchagnö Supay imayca gaycurätsignö mandädunchö catsinganpita geshpir, Supaypa munayllanta manana rurayanganatsu.

3

Cay mundu ushacaption ¿imanörag runacuna cayanga?

¹ Tsaymi cananga cuyay Timoteo cay mundupa ushacaynin junagcuna chämuptin alläpa sufrimientucunawan tucuyläya mana alli ruraycuna cananpag canganta musyanayquita munä. ² Waquincag runacunaga quiquillan cuyacurni imaycatapis quiquillanpag munar, gellayllapag ayrajarnin alläpa orgullöso car, runamajincunatapis allgotsäcurnin imaycatapis mana allicunata parlag cayan. Tsaynöllam taytancunatapis mana cäsurnin, ni pitapis mana agradëcicurnin mana llaquicug jutsasapa cayan. ³ Mananam perdonanacur

cuyanacuywan llaquipänacuypis canganatsu; alläpa yaga caynincunawan lluta imayca mana allicunata ashacurnin munaynincunata mana controlar ni geniuncunatapis dominayta mana puediyaptin. Tsaynömi alli ruragcagcunapa contran imayca mana allicunatapis rurayanga.

⁴ Runamajincunata traicionarnin alläpa yaga cayaptinmi, lluta mana alli parlaycunapis shimillancunachö caycanga. Tsaynöllam quiquinuncunapura orgullöso aläbacurnin yarpaynincunallachöga cushishga cayanga. Tsaynö lluta imayca viciucunata mas cuyarnin gustarmi, munayangallanta rurar Dios Yayapagga ni musyaytapis munayangatsu. Tsaynö runacunataga quiquin Dios Yayapis manam cuyantsu. ⁵ Alläpa allitucug carmi, Dios Yayapa poderninta rechazarnin shongoncunapis mana alli rurag captin, quiquinuncunapura ruraynincunalla allitucuyangantapis mana välegman churan. ¡Tsaynö runacunawanga ama ni mëticunquipistsu!

⁶ Tsay mana alli yachatsicugcunaga wajin wajin purirmi, dëbilcag warmicunatapis llullatsirnin imaycanöpa engañar, alläpa mana alli jutsa rurayman apaycäyan. Tsay warmicunaga tucuyläya quiquinuncunapura munayllanpita mana alli ruraycunachö melanaypag mana pengacurmi caycäyan. ⁷ Pero tsay warmicunaga segidu yachacuycarpis, Diospa Palabrantaga entendiyantsu ni rasumpacagta tantiyarnin musyayantsu. ⁸ Unay tiempuchö Janeswan Jambres shutiyog brujucunam Moiséspa contran amatsacuyangan. Tsaynöllam cay runacunapis Alli Willacuy maytsaychö willacushga cananta

amatsacuyanga. Tsaycunaga alläpa mana alli yarpayyog cayaptinmi, ni criyicuynincunapis cantsu. Tsaymi quiquin Dios Yayapis mana criyicug cayanganpita rechazashga. ⁹ Pero tsay yachatsicuyanganga manam alläpaga mirangatsu, tsay ishcan brüjucunapanö mana väleg yachatsicuynincunawan mana alli rurag cayanganta llapan runacuna tantiyacuyaptin.

Pablo Timoteota encargarnin gellgangan

¹⁰ Pero, gam cuyay Timoteo nogá yachatsingagta allim yachacushcanqui, firmi criyicur imapag cawangäta ricämar. Tsaynöllam musyanqui alli pacienciayog cuyacug cangätawan imaycaläya sufrimientucunatapis awantar pasangäta. ¹¹ Antioquiachö, Iconiochö y Listrachö gaticachar alläpa sufritsiyämaptin awantangätapis musyanquim. Pero Dios Yayam llapan imayca sufrimientucunapita salvamarni libramashga. ¹² Tsaynöllam Señor Jesucristo munangannö jutsannag rasumpa llaquipäcurnin shumag cawacug runacunaga, llapanpis sufritsirnin gaticachashga cayanga. ¹³ Pero tsay engañacur mana alli rurag runacunaga cada vez mas peor, mana allicunata ruracarnin engañacurpis, quiquillancunam mas engañoado cayanga. ¹⁴ Pero gamga nogapita yachacungayquinölla llapan yachacungayquita yarpararnin, firmi tsaracurnin imaycatapis awantar sigenqui, musyanquim pipita yachacungayquitapis. ¹⁵ Yarpay wamra cangayquipita Diospa Palabranta yachacungayquita. Diospa Palabranmi llapan yachayniquita

entenditsishunqui Señor Jesucristoman criyicungayquiraycu salvacänayquipag. ¹⁶ Diospa llapan Palabranga quiquin Dios Yayapitam nogantsic yachatsinacunapag shamushga. Diospa Palabranga piñapänacurnin plétunacur yachatsinacunapag y willanacunapagmi. Tsaynö piñapänacurnin cawaynintsicchö alli jormal jutsannag alli rurag runa canapag. ¹⁷ Tsaynöpam Dios Yayapa yachatsicugnин runaga, Paypag llapan imayca allicunallata rurananpag listo prevenido caycanga.

4

¹ Tsaymi alläpa poderoso cayninwan Señor Jesucristo cay patsaman cutimur cawagcunapawan wañushgacunapa jutsanta juzgag canganpita, Dios Yayapawan Señor Jesucristopa puntanchö willarniqui, cay alläpa cushicuypag encargota encargag: ² Diospa Palabranta imaypis willacunqui alli tiempu o mana alli tiempu captinpis. Tsaynö willacur shumag entenditsicurnin, plétur piñaparin animatsinqui mas allish cawacuyänanpag. Pero imaypis mana dëjaya alli paciencia yquian consolarnin plétucur shumaglla yachatsicunqui.

³ Chämungam tiempucuna rasumpacag yachatsicucunata manana awantarnin ni wiyatapis mana munayänanpag. Mas bienmi quiquinunapa yarpayllancunawan munayllancunapita yachatsicugcunata ashirnin puriyanga, mana alli yachatsicuynincunata wiyarnin alläpa gustar mas cäsucuyänanpag. ⁴ Diospa Palabranta wiyatá dëjasquirmi, unaycag

mana alli cuentucunallatana wiyarnin cäsuyanga.
⁵ Pero gamga, imaycachöpis alli juiciuyog jucläya
 alli runa canqui. Tucuyläya sufrimientucunata
 awantarnin, Alli Willacuytaga willacur rasumpa
 willacug cayniquiwan imaypis cumplinqui.

⁶ Pero nogam siga, imayca juc sacrificiunö
 Dios Yayapag listuna caycä. Tsaymi cananga
 tiempu chämushgana cieluman aywacunäpag.
⁷ Imaycanö aycaycanöpis imayca corregnömi, asta
 cananyag imayca peleagnörag Señor Jesucristopag
 willacurnin cumplishcä. Tsaynöpam payman
 llapan calppawan y shongöwan rasumpa alli
 tsaracurnin firmi criyicushcä. ⁸ Tsaynö alli
 tsaracurnin firmi criyicurnin cawangäpitam
 cananga cieluchö juc premiu shuyaycäman.
 Tsay premiutaga llapan runacunata mana
 juc jananparnin juzgag Señor Jesucristom
 garamarni entregamanga. Premiutaga manam
 nogallatatsu entregamanga, sinöga Señor
 Jesucristo cutimunanta alläpa munarnin
 shuyarar caycagcunatawanmi gararnin
 entreganga.

Apostol Pablo Timoteota plëturnin willangan

⁹ Au cuyay wauge Timoteo, ima rurayniquitapis
 dëjasquir saslla shamuycuy ricämagni. ¹⁰ Demasga
 cay patsachögacagcunallata cuyarmi, dëjascamarni
 Tesalonica marcpa aywacushga. Waugentsic
 Crescentetaga Galacia marcapam cachashcä y
 Titotanam Dalmasia marcaman. ¹¹ Waugentsic
 Lucasllanam nogawan caychö caycan.
 Tsaychö waugentsic Marcostapis ashisquirnин
 pagtayqui pushamuy, Diospa Palabranta

willacur Paypa alli arugninnö yanapamänanpag.
¹² Waugentsic Tiquicotanam Efeso marcaman mandashcä. ¹³ Caypa shamurga Troas marcachö Carpopa wajinchö jagemungä cäpätawan libröcunata apacarcamuy, pagtataq pergashchö gellgangäcunatapis apamuya gongascamunquiman. ¹⁴ Fierro tacag Alejandrom conträ car, imayca mana allicunata ruramashga. Pero shuyaycutsun Dios Yayam llapan imayca mana alli conträ ruranganta juzganga. ¹⁵ Tsaymi gam paypita cuidacuynayquipag willag, payga llapan willacungantsicpa contranmi ticrashga.
¹⁶ Primera vez autoridäcunapa puntanchö caycapti, manam ni pñipis yanagämargantsu llapanmi dëjascayämargan. Pero Dios Yayantsic perdonaycutsun tsaynö rurayämanganpita.
¹⁷ Nogam Señor Jesucristo pagtä caycagta sentirgä. Tsaymi Dios Yaya yanapamarni callpata garamar mas animatsimargan. Tsaynöpam rasumpacag salvaciunpag willacuycä, llapan mana judiucag runacuna wiyyänanpag. Tsaynö willacuycaptipis conträga manam wañunäpag sentenciamargantsu, Dios Yayä llapan imaycapita libramarni salvamaptin. ¹⁸ Tsaynö librarnin salvamarmi llapan mana alli ruraycunapita cuidaman Mandacuy Reynon cieluman changäyag. ¡Poderoso Dios Yaya imaypis mana ushacag glorianchö alläpa alabashga catsun! Tsaynö caycullätsun.

Apostol Pablopá bendiciunninwan despedicuy salüduncuna

19 Saludaycuy Priscilatawan Aquilata,
Onesiforopa wajinchö llapan ayllunta.
20 Erastoga Corinto marcachömi quëdamushga,
Trofimotanam Mileto marcachö geshyaycagta
jagemurgä. **21** Imaycata dëjasquirpis, cuyay tsurïnö¹
shamuycuy, manarag tamya tiempu chämuptin.
Caypitam Eubulowan Pudente, Lino y Claudia
salüduyqui apatsicayämun. Tsaynöllam Señor
Jesucristoman criyicug llapan waugentsiccunapis
saludaycuyäshunqui. **22** Señor Jesucristo
gampa shongoyquichö imaypis caycullätsun.
Tsaynölla cuyacuy yanapacuyninwan llapan
bendiciunninta gamcunaman churaycamutsun.
Tsaynö callätsun.

**Señor Jesucristo pa alli willacuynin
New Testament in Quechua, Northern Conchucos
Ancash (PE:qxn:Quechua, Northern Conchucos
Ancash)**

copyright © 2002 Wycliffe Bible Translators, Inc.

Language: Quechua, Northern Conchucos Ancash

Translation by: Wycliffe Bible Translators, Inc.

Quechua, Northern Conchucos Ancash

qxn

Peru

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quechua, Northern Conchucos Ancash

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
77fb173-382c-5cf8-8fc5-0731e0bb3f52